



Siverth K. Heilmann

UPA 2019/190-1

25. April 2019

Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UPA2020-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Henrik Fleischer, Siumut)

Imartatsinni sillimaniarnerup, umiarsuarnik nalunaarsuinerup, inatsiseqarnerup il il tamakkiisumik oqartussaaffigineqalersinnaanera pillugu inatsisartunut ilaasortap Henrik Fleischer-ip Siumut, siunnersuutaanut qujanaq, imatullu Atassut-miit oqaaseqarfigissavarput.

2015-ip ukiaanerani, imm. 28 uunga siunnersuummut assingusumik 2017-imilu misissueqqissaarsimaneq pillugu Inatsisartunut agguanneqarsimaneranik Naalakkersuisuniik eqqaasitsinerannut qujanaq. Suliat akisussaaffiillu tiguniarneranni sivirusinnaasarput, qulakkeerneqartariaqarmat inuttasaqartinneqarnissaat minnerunngitsumillu aningaasatigut kingunerisinnaasaat pillugit.

Kalaallit Nunatta imartarujussuani, inunnik usinillu assartuiffiugaluttuinnartumi, imarpik ikaarlugu nioqqutissanik pilersorneqarnitta saniatigut, sikuusarunnaariartornerata kingunerisaanik, nunatta avannaarsuanut angallannerit annertusiartuinnarfianni, siunnersuuteqartoq Atassut-miit isumaqatigaarput, imartavut tassaasut annertunerpaamik pingaarnerpaatullu aalisarfiunera.

Taamaattumik Atassut-miit isumaqarpugut, siunissami avaqqunneqarsinnaanngitsoq, imartarujussuatsinni sillimaniarnerup annertunerpaanissaata qulakkeerniarlugu, angallatigineqartut isumannaallisagaanissaasa piumasaqaatit naleqqussaaffigineqarnissaat.

Angallatigut imartatsinni angallatigineqartussat sikumut akiuussinnaasariaqarneri naleqqussagaasarput aamma taamaattariaqarput assersuutigalugu umiarsut takornariartaassuit, nunatta sineriarujussuani angalasartut angalasalerumaartussanullu piumasaqaateqarnerunissariaqarpugut.

Imartatsinni angalanerusoqalernerata kingunerisaanik mingutsitsineq minnerulernani annertusiartorpoq, ajoraluartumillu umiusoqartareerpoq, umiusarnerillu amerliartuinnassanngippata uaguusariaqarpoq inatsisartuni, inatsisinik sukaterinissamut suliaqartussat.

Aap siulitta qangarsuaaniilli, qajaannanguamik umiamillu inuuniuteqarsimanerat inuullu nukii kisiisa atorlugit ukiorpassuarni siammarsimanerat ataqqillugit eqqaasarpagut, massakkulli angallatigisagut motoori uulialu atorneqarnerani, annertoqisumik imartatsinnut mingutsitsineq atugaavoq.



Atassut-miit isumaqarpugut, mingutsitsineq millisinnegassappat, uuliamik kinertumik atuineq ilanngullugu mingutsitsinnginerusumillu atugaqalernissaq siunertaralugu pimoorussamillu nalilersuisariaqalersugut.

Taamatut oqaaseqarluta, siunnersuuteqartup anguniagaanut tunngaviatigut tapersiivugut, taamaattorli Naalackersuisut allannguutissatut siunnersuuteqarnerat Atassut-miit isumaqatigaarput, ataatsimiititaliami susassaqartumi peqqissaarullugu suliarineqarnissaa inassutigalutigu.

Qujanaq.